

左文襄公奏疏

第一函
第十冊

左文襄公奏疏續編目錄

卷十

總統現到各軍籌剿捻逆摺

請分別防剿機宜摺

請直隸抽撥練軍嚴扼固關片

行抵直隸省郊現籌進剿摺

擒逆竄近深州並劉郭喜三軍戰勝片

官軍疊獲勝仗現籌剿辦摺

官軍追擒疊勝現籌合力兜剿摺

請部撥銀兩暫資接濟片

劉松山等請獎敘片

皖豫兩軍另懸賞格片

官軍剿擒迭獲大勝摺

補報郭寶昌戰事片

左文襄公奏疏

續編卷十目錄

捻渡滹沱籌防籌剿片

左文襄公奏疏續編卷十

奏總統現到各軍籌剿捻逆摺

同治七年二月初二日

奏爲遵

旨總統現到各軍籌剿捻逆恭摺馳陳仰祈

聖鑒事

臣於正月二十九日在正定營

次准兵部火票遞到同治七年正月二十六日內閣奉

上諭欽差大臣左宗棠現在行抵獲鹿所有

直隸現到各路官軍均著歸該大臣總統調度欽此同日欽奉

寄諭仰蒙

聖謨廣運

指授

機宜曷勝欽感

臣自行抵獲鹿一面派弁確探賊蹤一面採辦軍糧以備裹帶前進二十六日聞賊趨東

鹿窺渡淖沱

臣未及候糧卽督隊赴淖沱河北依橋扼紮以防該逆循河西竄旋據探報該逆因冰泮不

得南渡復由束鹿深澤向西北竄走並擾及定州北境適接劉松山郭寶昌來稟兩軍於正月二十二日

四鼓會同安住馬隊在饒陽西北王岡西張岡襲賊獲勝斃賊約四百名牝驃馬三百餘匹解散脅從二

千餘名至二十五日已追入深州境內而賊從西北詭避復向北趨

臣比卽移駐正定東北以各營自獲

鹿至正定官紳購辦糧草不數日用東北一帶採辦尤難不得不稍謀裹帶以備戰事正在催糧拔隊間

接張曜宋慶稟報二十七日馳出賊前自保定西路迤紮至滿城山麓出隊截剿獲勝克遏狂氛賊已折

向南竄矣並據張曜等稟稱劉松山郭寶昌已馳抵保定

臣比卽由新樂赴定州一面咨行現到直隸之

各路官軍在賊之北者向南壓剿在賊之東者自東北向西南進剿在賊之西者自西北向東南進剿各

將前進日期報臣以便相機籌辦各軍亦互相知會聲勢聯絡步步逼壓如至滹沱河北各軍厚集機局緊湊卽感賊於河濱倘各軍距賊遠近不同不能如期並至卽俟該逆渡河後北路局勢更穩再痛加剿洗臣至定州後如賊逾定州東南臣亦卽移營南下與各軍聯絡進剿一切機宜謹當與署直隸督臣山東撫臣河南撫臣妥爲商酌所有現籌剿賊情形謹繕摺馳陳伏乞 皇太后 皇上聖鑒訓示施行謹 奏

行謹 奏

軍機大臣 字寄同治七年二月初五日奉 上諭左宗棠奏總統各軍籌剿捻逆一摺所陳三路進

兵并令各軍互相知會聯絡聲勢爲步步進逼之計布置頗合機宜惟賊勢現由祁定高陽分擾任邱河間意在東撲天津昨已諭令官文於潘鼎新程文炳兩軍內揀派得力之軍馳赴雄縣任邱大城等處分紮扼截東北矣丁寶楨現住河間楊飛雄陳濟清等分紮鄭州任邱其河間以南阜城景德等處尙覺空虛賊騎避兵繞竄蹈隙乘虛是其慣技左宗棠現住正定距前敵較遠應行移紮何處并如何調撥各軍扼截或分路進兜以剿爲防杜賊竄津並紛竄東北之處均著該大臣懷遵昨日諭旨相度機宜酌量辦理將此由六百里諭令知之欽此

請分別防剿機宜摺

同治七年二月初六日

奏爲謹擬分別防剿機宜恭摺馳陳仰祈

聖鑒事竊臣

於本月初二日在正定營次具陳籌剿情形

後據探報賊蹤竄蠡縣高陽一帶劉松山郭寶昌喜昌各軍均赴安州截剿昨於初三日欽奉二月初一

日 寄諭潘鼎新程文炳兩軍甫經趕到著卽在北面穩紮以固京畿門戶藉可暫事休息其餘張曜

宋慶劉松山郭寶昌喜昌等軍均著官文催令分路進攻務須由北向南節節壓剿以期痛殲醜類左宗

棠著由西南一路趕緊進次以期兜裏嚴密等因欽此臣維捻逆慣技在飄忽馳騁避實乘虛始猶馬步

夾雜近則掠馬最多卽步賊亦均乘馬臨陣則步賊下馬挺矛攢刺而騎賊分抄官軍之後其乘官軍也

每在出隊收隊行路未及成列之時遇官軍堅不可撼則望風遠引瞬息數十里俟官軍追及則又盤折

回旋亟肆以疲我其欲東也必先西趨其欲北也必先南下多方以誤我賊馬而我步賊輕捷而我重輦

賊恣掠而馳官軍必待糧而走賊專用長矛官軍則必兼用槍礮賊之輜重少官軍之輜重多故賊速而

官軍遲尾追之戰多迎頭之戰少盤繞之日多相持之日少也現在諸賊妄圖北犯暫無南竄之意直隸

地勢平衍無岡阜塘濼足限戎馬主客各將領身經百戰與劇賊周旋日久非不思迅與驅除早圖戡役

也而局勢固有難焉者賊蹤現距 京畿不過三百餘里官軍南趨賊必北嚮追官軍折而北趨慮將

又落賊後一也現在諸軍均幸已繞至賊北矣然賊由東南而西北諸軍盡馳而西賊由西南而東北諸

軍又將盡馳而東無論往返奔馳兵力必漸形勞憊且恐官軍迸聚一方狂寇有時或且乘虛肆逞終遂

其北犯之計二也劉松山郭寶昌喜昌與臣書均頗以此爲慮而欲於近 京之處設立重防然後放

心向南縱擊臣維

畿內西南路以涿州爲總要南路以固安爲總要茲值各軍雲集應請

欽派

機健將領率勁旅兩支一駐涿州一駐固安責令嚴防以重形勢此爲近防之軍卽賊蹤稍遠亦未可遽撤也保定河間天津三郡鼎峙保定距河間近而天津距河間稍遠現有重兵在河間如天津有警尙可橫出截之然三郡屏蔽

畿郊防軍倘涉空虛必多罅隙此爲且防且剿之軍須隨時調度不可併聚一方亦不可悉數南下也其進剿之軍則視賊所向併力攻剿如將逆賊逼過淖沱則與山東河南諸軍共收夾擊之效如賊逸出而北則與保定河間天津諸軍共收夾擊之效較之專防而不能剿專剿而無以爲防者稍覺周妥臣謹擬就

諭指前敵各軍遵

旨分別調撥以專責成庶冀剿足以剿防足

以防無前突後竭之虞無顧彼失此之患辦理或可漸有把握惟智小謀大力小任重不敢不慎之又慎

耳臣於初四日行抵定州因沿途雇覓車馱極艱而派員購到軍糧已解新樂及軍火落後者無車馱裝運阻滯不前定州雖可橫出高陽而軍無隔宿之儲道出祁州博雅一帶新遭蹂躪無從採購軍糧萬難由此前進擬徑由望都以抵保定與官文通盤商籌布置及各軍糧料轉運事宜卽赴前敵督率諸軍一意進剿前奉

寄諭前敵進剿各軍如有觀望遷延不遵調度者左宗棠當據實參奏毋得徇隱干咎

臣膺茲重任又正當罪釁山積之餘更何忍稍逞己私致誤大局不但與各督撫臣商確一切誼取和衷卽諸將領功過所在臣既履行間自當一秉至公據實上達倘有私毫欺隱屈抑戰功抑或有意姑容致

涉獨縱皆足以失軍心而驛衆志一經 聖明察出更將何地自容 臣雖至愚極陋不敢出此所有預擬分別防剿及取道前進事宜謹拜摺馳陳伏乞 皇太后 皇上聖鑒訓示施行謹 奏

請直隸抽撥練軍嚴扼固關片

同治七年二月初六日

再 臣疊次欽奉

寄諭以井陘爲入晉大道

命 臣嚴防查獲鹿入山逾太行至晉境以固關爲最

險但得一千節制之師扼守關隘賊騎斷難挺走該處糧旣不足井泉亦少駐軍太多無所飲食 臣旣奉

命統各軍進剿日趨東北勢難兼顧固關 臣所部五千人又未便再事分撥致軍兵力應請 敕下直

隸督 臣抽撥練軍一千人迅往固關嚴扼入晉之路倘賊蹤西竄前阻關隘後有追師山逕不能馳騁必

難善脫也謹附片馳奏伏乞 聖鑒施行謹 奏

軍機大臣 字寄同治七年二月初八日奉 上諭左宗棠奏分別防剿機宜并請派練軍駐紮固關

各摺片覽奏俱悉成勢現由獻縣竄擾青縣涿州一路有神機營駐紮丁寶楨現往河間即可北顧固安

一帶本日已諭令撥兵馳赴大城任邱等處會合津軍嚴密扼紮并諭令左宗棠官文迅飭劉松山郭寶

昌喜昌張曜宋慶等軍專意進剿程文炳暨春壽所統馬隊分赴任邱大城各處協力防剿保衛畿南矣

前據神機營王大臣奏擬請各路統兵大臣并各督撫分路防剿當經諭令左宗棠官文專顧西北現在

賊勢趨重東南津郡喫緊兵力又單保定一帶情形稍鬆左宗棠日內計已到省卽著與官文商度機宜

并迅催各軍分路進攻或繞前迎擊或躡蹤追剿不可稍形鬆懈恭親王等距前敵較遠左宗棠當卽馳赴東南迅督各軍迎頭截剿痛掃逆氛一切進止機宜不必專候神機營指示以期迅速其西北一路防務卽著責成官文辦理固關一路空虛可慮著官文酌派得力直軍一千名交唐訓方統帶或另派統將帶赴該處防堵以杜賊匪回竄晉疆將此由六百里各諭令知之欽此

行抵直隸省郊現籌進剿摺

同治七年二月初十日

奏爲

臣軍行抵直隸省郊現籌進剿情形恭摺馳陳仰祈

聖鑒事竊臣於本月初七日已刻督隊馳

抵直隸省郊駐營黃家莊自定州以北各站糧不敷用所帶行糧支食無餘軍裝輜重因雪消泥深半滯

中道就省換車尙須湊集

臣一面與官文籌商防剿機宜一面催趲軍裝採辦行糧卽出高陽相機進剿

適准崇厚來咨捻逆游騎逼近青滄津南喫緊旋據深州探報賊騎於初四日回竄州境距城僅十餘里

等語賊情狡詐難保非西南游駛牽誤我軍仍逞其圖犯津沽之計

臣抵高陽後如賊仍趨東路臣卽馳

赴天津之北向南壓剿如賊由深州西南竄走卽檄程文炳自高陽急起追截

臣亦卽由東北而西南檄

諸軍奮擊現已飛飭前敵各軍偵賊所嚮分道兜剿並令力顧津南一帶矣

臣少官文十四歲筋力較可

支持

臣既親赴前敵督剿有人而保定城屏蔽

畿郊最關緊要督

臣出省人心不免驚疑且恐逆蹤

飄瞥靡常出省之後仍須回顧翻不如從容靜鎮免啟戎心官文現正料理前進

臣勸其少緩候

旨

遵行應否

飭官文留鎮省垣之處出自

聖裁所有

臣軍行抵保定現籌進剿情形謹繕摺馳陳

伏乞

皇太后

皇上聖鑒訓示施行謹

奏

擒逆竄近深州並劉郭喜三軍戰勝片

同治七年二月初十日

再正拜摺聞欽奉二月初八日

寄諭並遞回

批摺跪讀之下仰見

宸謨廣運

訓示周

詳莫名欽感頃接深州稟報大股擒逆竄近州境而郭寶昌稟報初四夜與劉松山喜昌會軍進剿大獲勝仗逼賊向西南竄走是賊現竄近深州而滄青界內已無賊也所有各軍初四夜戰勝情形容續詳細報陳謹附片具奏伏乞

聖鑒謹

奏

軍機大臣

字寄同治七年二月十二日奉

上諭左宗棠奏行抵保定現籌進剿并劉松山等會剿

獲勝各摺片擒逆在獻縣境內被官軍剿敗折向深州一帶竄擾劉松山郭寶昌喜昌等業經各率所部會同追擊左宗棠卽著出省馳赴前敵嚴檄該將士等實力兜剿迅殄賊氛勿任匪蹤到處蹂躪青滄界內無賊東路情形稍鬆該大臣當由東北逼向西南痛將賊匪剿洗勿任回竄程文炳一軍卽著飭令由高陽一帶視賊所向節節進剿毋庸調赴大城任邱一帶春壽所部馬隊并山東新到之吉林黑龍江馬隊千五百名著左宗棠官文飭令春壽一併帶赴前敵會剿官文卽著留駐省城嚴防北路并接濟前敵各營軍火糧餉勿令缺乏賊勢漸趨西南固關爲山右門戶防守緊要前經諭令官文酌撥唐訓方帶兵

千名或另派得力兵將前往該處防守著卽懷遵前旨妥速辦理山西平定孟縣一帶併遼州各山路要隘著鄭敦謹迅速派兵堵扼以杜賊竄晉疆之路毋稍大意將此由六百里各諭令知之欽此

官軍疊獲勝仗現籌剿辦摺

同治七年二月初八日

奏爲官軍兜剿擒逆疊獲勝仗現籌剿辦情形恭摺馳陳仰祈

聖鑒事竊劉松山等於本月初四日

在獻縣商家堡等處大獲勝仗後擒逆復向東南折竄初十日劉松山郭寶昌喜昌均向東追剿出賊之北賊踞深州東南二十餘里窩鋪頭五子台一帶劉松山等緘約張曜安慶自西北向東南進發劉松山等自北而南兩面夾擊是夜四鼓出隊劉松山在右郭寶昌在左喜昌馬隊及劉松山郭寶昌所部馬隊分爲右路之右左路之左進至窩鋪頭天色微明該逆馬步散處各村驚遽失措賊向西南紛竄各巢之賊同時驚亂劉松山亟飭所部分道驟進當將賈城瓦口等村賊巢十餘處一律攻破斃賊甚多敗賊悉向北黎園村竄走各軍躡踪追及逆首張總愚率悍賊數千冒死返撲劉松山督隊鏖戰間郭寶昌已將五子台等處賊巢攻破馳至合隊聲威更盛奮力衝殺斃賊數百名賊不能支悉向南敗走喜昌所部馬隊復將馬隆莊馬莊趙家馬頭南梨園鄭家莊一帶踞賊擊敗斃賊三百餘名馬步各軍追剿二十餘里至陳家莊沿途斃賊尤夥劉松山等恐尾追太急該逆復折而北商定直向西路十一日酉刻抵深州迤西之東陽頭收隊是役劉松山郭寶昌喜昌各軍共擒斬悍賊一千餘名奪獲騾馬軍械無算解散脅從

數千名官軍陣亡五名受傷三十二名此十一日官軍在深州東南剿擒大獲勝仗之實在情形也十二日五鼓劉松山郭寶昌朱慶喜昌分道西進至東鹿屬之舊城一帶聞賊正向祁州北竄各統所部擊向北趨卽趨行前進中途遇賊卽擊馬隊徑穿賊陣將賊衝爲數段步軍乘勢蹙之立刃悍賊數百奪賊驛馬五百有奇逆賊紛紛敗竄不復能如常日之堅悍矣蓋倉卒抗拒尙未成列也十三日午刻追至博野屬之南鄧村忽據探報賊向東來遂合排隊迎擊正進隊間賊騎已圍撲郭寶昌各營劉松山催隊亟由郭寶昌隊伍東南面馳出迎擊分中左兩路進郭寶昌由右路進喜昌馬隊張兩翼夾擊劉松山郭寶昌所部馬隊直前衝鋒大股騎賊分作數十團蜂擁突至步賊繼進官軍奮威猛進槍礮環轟賊騎紛紛敗潰步賊望塵先遁官軍乘勢掩殺宋慶等適由北面壓剿而來軍威益壯賊悉向西竄各軍合追二十餘里收隊而還方賊之衝撲郭寶昌營盤也郭寶昌乘輕騎來臣宗棠行營商議進剿機宜問道回營之際突向衝撲參將郭運昌等出隊擊之郭寶昌行近本營二里隨身僅騎卒三十耳賊漸馳而前識其爲郭寶昌急嗾死黨圍之數重副將王鳳鳴率隊來援郭寶昌與隨身騎卒左右馳突戮斃悍賊數名始得與王鳳鳴會合千總岳正江力護主將被槍子中脅前陣亡已保知縣府經歷方開第在後遇害傷亡兵勇十餘名此十三日各軍在博野境內截剿獲勝之實在情形也是日臣宗棠適抵蠡縣聞賊東趨出隊邀擊賊之探騎爲臣軍擒斬十餘名獲驛馬十餘匹比聞賊圍郭寶昌營加隊助剿未至而賊已敗遁矣臣

宗棠於十一日出高陽與程文炳會晤十二日至蠡縣十三日將輜重分寄縣城十四日西行追賊行抵望都之界南村與劉松山喜昌宋慶會晤知賊踪南竄沿途徧問渚沱河橋梁水勢慮其由正定趨獲鹿乃與各將領計議以張曜宋慶兩軍自祁州東面南下向西南逼剿劉松山郭寶昌喜昌各軍自北而南兼顧西路亟檄程文炳趨正定期感賊於河濱臣卽於十五日進至祁州南四十里之北張村十六日於深澤道中聞張曜宋慶劉松山郭寶昌等擊賊獲勝斃悍賊又多尙未接據各軍呈報途次詢問鄉民前此賊過時踞村落八九十處今僅占二十餘處軍械拋棄過多有並無兵器者賊勢不爲不感但苦無險阻以限其狂奔之路尙未能迅速戡事現已添調春壽善慶馬隊馳赴前敵以利追奔但期逼向西南則局勢較易得手惟當和衷協力共籌防剿以冀仰紓宸廑所有官軍剿擒屢勝及現籌兜剿情形謹合詞恭摺馳奏伏乞 皇太后 皇上聖鑒訓示施行謹 奏

軍機大臣 字寄二月二十二日奉

上諭官文左宗棠奏深州等處剿賊獲勝並李鴻章奏定平剿

賊疊勝各一摺覽奏忻慰具見該大臣等調度有方將士用命本日已明降諭旨宣示卽著官文左宗棠李鴻章乘此聲威迅飭各軍商同兜剿感之渚沱河濱一鼓殲除同膺懋賞所有劉松山等軍陣亡之官兵及千總岳正江知縣方開第均著左宗棠查明奏請優卹李鴻章所部之陣亡擬保總兵銜副將尹昌景參將擬保副將龔興祖均著交部從優議卹現在賊勢已感左宗棠擬添調春壽善慶馬隊以利馳逐

春壽所部馬隊前本有旨會同陳國瑞步隊作爲游擊之師左宗棠係統兵大臣卽著隨時調度將春壽陳國瑞一併調赴前敵以資攻剿兼可相機策應各軍李鴻章因景德空虛恐該逆被剿東竄津郡又形喫重見飭周盛傳挑隊徑趨武強小河口截剿爲郭松林等後援兼以屏蔽東路該大臣擬暫駐景州卽著照所請辦理倘賊有向東北竄逸之信仍著該大臣進紮河間以資堵剿丁寶楨卽著飭王心安等軍相機扼紮隨時偵探毋致稍有疏失崇厚亦當飭令陳濟清等軍加意防範不可以賊蹤略遠稍涉大意保定一帶仍著官文妥爲防範毋令乘間竄逸是爲至要將此由六百里各諭令知之欽此

官軍追擒疊勝現籌合力兜剿摺

同治七年二月二十七日

奏爲官軍追截擒逆疊獲勝仗賊由東南折竄東北被擊忽向西南現籌合力兜剿恭摺奏祈

聖鑒

事竊本月十三日以前剿賊獲勝情形

臣

等已於十八日恭摺陳報十五日午間宋慶率所部行抵深澤

縣南十餘里逆騎千餘三面馳至當經宋慶擊敗是夜二鼓張曜率所部繼至合隊劉松山等調悉賊蹤

廬聚深澤縣南二十餘里各村當緘約宋慶張曜兩軍由北而南劉松山自與郭寶昌喜昌各軍由西北

向東南進剿宋慶亦偵知城南三十里西華集一帶賊館甚多卽與張曜會商乘夜襲剿三鼓後銜枚疾

進十六日寅刻直逼西華集派隊由左右先鈔賊後各率精銳奪卡而入賊正噉黨抗拒忽聞官軍鈔至

村後遂駭而奔官軍分股壓剿將西華集賊踞一帶村莊奪回敗賊向南潰逃漸又向東官軍躡蹤追剿

該逆未敢回拒計生擒悍賊一百餘名斬殺無算解散脅從尤衆各村遺棄騾馬輜重不計其數比劉松山等督隊逼近賊巢聞東西礮聲知宋慶等已在接仗催軍亟進劉松山由左郭寶昌由右喜昌及全福馬隊進右路之右劉松山郭寶昌所部馬隊進左路之左西面賊巢悍逆正圖向東援應東面之賊忽被馬隊衝擊其小教村之賊爲馬隊截斷該逆不及竄遁被官軍擒殲殆盡各軍躡追二十餘里薄暮收隊計共斃老賊數百名拔出難民無數賊中拋棄軍械沿途甚夥此十六日宋慶張曜劉松山郭寶昌喜昌各軍東西夾擊大獲勝仗之實在情形也先是屢據探報賊竄漳沱河水勢甚洶決意竄過是日臣宗棠行營在賊北五十餘里賊騎東西橫出有西南趨晉州境者慮其於橐城晉州交界之陳村桃園涉淺及由正定過橋因與各將領計議以宋慶張曜赴東北路劉松山郭寶昌喜昌馬步軍赴北兼顧西面其程文炳一軍與臣宗棠親軍赴西路十六日據程文炳報稱賊在深澤南路潰敗後已折向東北卽飭程文炳改赴東北會剿而自率親兵各營赴無極擬感賊於陳村桃園水濱也是日申酉間賊至安平西北適李鴻章前隊郭松林楊鼎勳兩軍自景州武邑武強繞至安平與賊相值該兩軍接仗情形已由李鴻章馳報矣十七日賊衆竄至饒陽東三十里左右之孔中旺蔡家莊前南旺村一帶劉松山郭寶昌喜昌程文炳宋慶張曜各軍均集饒陽乘夜分路進剿十八日丑刻程文炳由西南面進攻前南旺村一帶劉松山郭寶昌喜昌宋慶張曜由東北面分道齊進程文炳一軍行二十餘里聞賊中吹角聲亟催軍疾進程

文炳督同總兵李得勝提督銜總兵李鎮國三路排進以總兵劉先文在後策應賊衆益棄輜重向東南狂奔當將前南旺村餘賊四五十名搜殺淨盡督隊躡追劉松山等各軍由東北面壓剿而前已將賊衆所踞各村奪回斃賊甚夥天明各軍會合四面兜擊該逆力不支策馬紛竄受傷不計其數向南奪路而走各軍躡追二十餘里沿途擒斬甚多直至獻縣西河低村始各收隊是役共斃悍賊七百餘名生擒二百餘名拔出難民數千人奪獲驛馬器械無算此十八日劉松山郭寶昌喜昌程文炳宋慶張曜各軍兜剿獲勝之大略情形也是夜賊由饒陽以南向西竄走據郭松林楊鼎勛呈報十八九兩日擊賊獲勝賊趨深州等語十九日劉松山等均向西追剿二十日追至距晉州二十里之石村偵知賊騎已至晉州西南慮其折向北趨乃分兵向西北繞進二十一日賊騎果向西北比見官軍立即駭遁折向東南竄走各軍分道追擊均有斬馘二十二日抵深州東十里之張姓莊訶悉該逆踞宿大洪營一帶劉松山飛緘約各軍進剿劉松山由右郭寶昌由左馬隊在步隊兩傍張翼以進賊見官軍至卽向東潰走各軍乘勢追擊其左路王家莊之賊不及出村經郭寶昌所部擒斬甚夥各軍合追二十餘里沿途殺賊尤多是役共擒斬悍賊約三百餘名奪獲軍械驛馬無數拔出難民尤衆此二十一二兩日劉松山郭寶昌喜昌各軍追剿獲勝之大略情形也

臣宗棠於十七日追賊至無極之石村聞賊折向東南擬卽改赴東路而行營已乏糧三日途中零星採買日不敷食不得已於十八日馳至正定將派員購到之糧裹帶以行比思直

趨河間二十三日行過肅甯五里駐紮牛軍莊賊從東南而西南稍折而西北仍向東南至是被各軍追急忽向東北竄至肅甯比據探馬回報賊騎已突近副將楊鳳元營門楊鳳元率馬隊數十騎迎擊步隊繼進賊分正南東南西南三路猛衝而來楊鳳元派隊分投截剿槍矛並進斃賊多名被創落馬者無算生擒四十餘名奪獲騾馬百餘匹賊與楊鳳元短兵相接之際疑爲郭寶昌馬隊比知臣宗棠親軍且戰且走步隊各營成列而出楊鳳元已向西南追擊數里而還時已昏黑賊騎皆狂奔而去矣是夜四鼓楊鳳元復與哨長馬開先分帶馬隊乘霧追襲槍斃賊匪多名賊衆驚潰遺棄騾馬旂械不可勝數二十四日黎明臣宗棠督親軍及各營跟蹤追剿行約二十餘里追及斷後騎賊當飭提督楊和貴副將楊鳳元都司丁太洋等各派馬隊數十騎直前衝擊斃賊數十名傷者無算生擒百餘名分別斬釋餘賊向西南狂竄難民乘間得脫者將以千計奪獲騾馬五百餘匹其遺棄中途之騾馬不下一千匹悉任鄉民牽去禁軍士爭取以免亂行訊據生賊供二十三日賊伺隙向東北奔竄不意官軍突起迎擊將賊截爲二段直至二十四日午後始繞避官軍悉向西南合股等語適程文炳馬隊馳至卽調集所部馬步各營向西南排進復追二十餘里至博野屬之莊河頭收隊程文炳二鼓後卽出隊已飭向祁州躡剿臣宗棠於二十五日西北向蠡縣以顧高陽前路此二十三臣宗棠親軍截剿捻逆跟蹤追擊兩獲勝仗之實在情形也自初四日獻縣獲勝後大小已十餘戰以二十八日兩戰爲大捷然各軍步多騎少賊稍受創